

२ पत्रुस

ब्रेक्ब मुर: पत्रुसमी एको चिठी थमा सुइक्ब आन कली नोले ब्रेक्शो बाक्त।

गेना ब्रेक्शो: एको चिठी डोंइती डा क्येडा इच्का नोले ६४-६५ ए. डी.मी मेर ब्रेक्शो बाक्त।

मार ब्रेक्शो: पत्रुसमी थमा सुइक्ब आन कली परमप्रभु यावे आ लोव्र पाइब आन ब्रेक्शो लोव्र तुइश्शा नु होस पा बाक्कीन, दे अरेशो बाक्त। मारदे हना मेको आन दाते रे दूली शेंब बोक्तेकम। मेको दूली शेंबपुकी दोदेशो बाक्नीमदेशा हना,

१. प्रभु येसु ख्रीस्त परमप्रभु यावे आ तौ मबाक्ब।
२. क्येट शुश दाक्ब बाक्नीम।
३. मरिम्शो पचा मुने मपाइनीम।
४. नक नु बोल्यो मदुम्शो थमा सुइक्ब आन कली हेंथे लां कोइनीम।

डोंइती डा लोव्र

1 गो येसु ख्रीस्त आ वाइल नु आ सोइश्शो, सिमोन पत्रुस नड। इं परमप्रभु यावे नु पाप रे प्रोंइब येसु ख्रीस्त रे पा ठीक दुम्तय, दे थमा सुइश्शा, थुं का दुम्तय। मोपतीके इन कली एको चिठी ब्रेक्ताकड।

2 परमप्रभु यावे नु प्रभु येसु कली तुइक्तीकेमी शिशी नु इन थुं नाइक्तीके बारना बारन लल।

थमा सुइक्चा नु गेय गारचा माल्ब

3 परमप्रभु यावे आ सक्तिमी ब्रोंइचा नु परमप्रभु यावे आ डोंइती बाक्चा कली मार मार माल्या, मेको नेल्ल इं कली मो गेप्टु। दोपा गेप्टु देशा हना, मेको कली तुइक्तीके गेप्टु। आ छेडछेडमी बाक्चा नु आ पतीके नेल्ल पचा कली योव्रतु। १पत्रुस २:४

4 मोपा आ नेल्ल क्येडा ठेयब थोक्शा पशो लोव्र गेप्तु। मेको तुइश्शा, गेपुकी रागी डा मुर आन दला दाक्स पतीके रे ब्रोंइशा, प्रोक्ने चाप्नीनी। मोपा गेपुकी परमप्रभु यावे आ पशो खोदेशो पाइब दुम्नीनी।

5 मोपतीके गे इन थमा सुइक्तीके नु इन पशो गेय गारचा माल्ब। इन पशो गेय नु “परमप्रभु यावे आ दाक्शो मार बाक्मे?” दे तुइक्चा माल्नीनी। गलाती ५:६, २२

6 इन तुइक्तीकेमी आंमा अरेसीचा माल्नीनी। आंमा कली अरेसीतीके, पपाइक्तीके नु थमा सुइक्तीके मप्रोंइनुड, दे खोइली थेक्शा बाक्चा माल्नीनी। इन खोइली थेक्शा बाक्तीकेमी परमप्रभु यावे खोदेशो पा गेय पने।

7 परमप्रभु यावे खोदेशो पा गेय पशा, थमा सुइक्ब आन कली आंम इन लोक्ब खोदेशो पचा माल्नीनी। लोक्ब खोदेशो पा दाक्चा माल्नीनी। गलाती ६:१०

8 गेपुकी मोदेशो शुश पाइतीनी हना, इं प्रभु येसु ख्रीस्त कली तुइक्तीकेमी रिम्शो पा शुश फल सिश्शो खोदेशो दुम्ब।

9 सुम मोदेशो मपाइबा, मेको ब्रा ब्रा पा ताइब बाक्ब। मेको मुर आ डोंइती पशो पाप क्याम्शो बाक्ब, दे प्रेंशो बाक्ब। १यूहन्ना २:९, ११

10 मोपतीके आं लोक्बपुकी, गेपुकीमी “गो ब्रेशो नु योव्रशो मुर बाक्नीकी” दे गेना हना यो मिम्चा माल्नीनी। मो पाइतीनी हना, गे गेनायो नोले मशोंइसीनीनी।

11 मिनु नोले पाप रे प्रोंइब इं प्रभु येसु ख्रीस्तमी इन कली आ गेना हना यो लीब राज्यमी रिम्शो पा ओव्रचा गेब।

12 मोपतीके गो इन कली नेल्ल नाक्ती मोदेशो मिम्पाइक्नुड। गेपुकी मेको तुइश्शा नु थमा शेंतीके पाइब दुम्तीनी हना यो, गो इन कली मिम्पाइक्नुड।

13 गो ब्रोंइडा सम्म इन कली मिम्पाइक्चा रिम्शो बाक्ब, दे मिम्नुड। २कोरिन्थी ५:१

14 इं प्रभु येसु ख्रीस्तमी “गे शुश नाक्त मलीनेवे” दे कोंइताक्यी।
यूहन्ना २१:१८-१९

15 मिनु आं लचा नोले गे नेल्ल नाक्ती आं शेंशो मिम्ने चाप्नीनी,
दे शुश गेय पना पन बाक्नुड।

छिडछिडम ब्रशो बत्ती

16 गोपुकीमी इन कली इं प्रभु येसु ख्रीस्त आ सक्ति नु आ रागीम
जाक्शो आ पर्बम मुर आन सेल्शो कथा मशेंदक। तन्न गोपुकीमी
“येसु ख्रीस्त नेल्ल क्येडा ठेयब बाक्ब” दे आंम आंइ मिक्चीम
ताइतक।

17 इं आफ परमप्रभु यावेमी मेको कली मान पशा, आ छेडछेड
तपाइश्शा “मेको आं दाक्शो तौ बाक्ब। मेको कली तशा, गो
ग्येरसाक्यी” देंशो सेंदा छेडछेड रे गूत। मत्ती १७:५

18 गोपुकीमी मेको सेंदा सरीड रे नेंतक। मारदे हना गोपुकी मेको
नु परमप्रभु यावे आ डांडाम बाक्शो नकी।

19 मिनु गोपुकीमी साइ डा परमप्रभु यावे आ लोव्र पाइब आन
पशो लोव्र मुल रिम्शो पा रुप्तक। गे यो परमप्रभु यावे आ साइ डा
लोव्र पाइब आन ब्रेक्शो लोव्र रुप्चा नु तुइक्चा कली छिडछिडमी
ब्रशो बत्ती खोदेंशो पा होस पा बाक्कीन। मिनु नोले इन थुंमी सुक्कुर
सोरुल खोदेंशो पा छेडछेड दुम्नीनु, आन ब्रेक्शो नेल्ल रुप्नीनी।
भजन संग्रह ११९:१०५

20 गोपुकी डोंइती मार रुप्चा माल्नीनी देंशा हना, परमप्रभु यावे
आ साइ डा लोव्र पाइब आन ब्रेक्शो लोव्र मुर आन मिम्शो लोव्र
ममाइ,

21 मुर आन थुं रे मपीब। तन्न परमप्रभु यावे आ सोक्तीम आ मुर
आन कली सुम्शा, परमप्रभु यावे आ लोव्र ब्रेक्पाइश्शो बाक्ब, दे
रुप्चा माल्नीनी। १तिमोथी ३:१६-१७

2

दूली शेंबपुकी यहूदा ३-१९

1 साइ डोंइती परमप्रभु यावे आ लोत्र जोल पा दूली शेंबपुकी बाक्मा बाक्त। मुल मोदेशो जोल पा शेंबपुकी इन ग्रुम्तीक खिंमी यो जाक्नीमी। मेकोपुकीमी खुइश्शोमी खतम सेल्ब शेंतीके शेंनीमी। प्रभुमी मेको आन कली ग्याप्शा यो, मेकोपुकी “गो मेको कली मतुइक्नुड” दे जाम्शा लाइब बाक्नीम। मत्ती २४:११; १तिमोथी ४:१

2 शुशेमी आन शेंशो नेंशा, हेंथे पा दला दाक्स यो पाइनीम। मुरपुकीमी मेको आन कली तशा थमा लां कली शुक्शी लोत्र पाइनीम।

3 मेको आन शीम पतीकेमी इन कली दूली लोत्र पा, इन क्येट योल्नीम। मेकोपुकी डोंइती रे नरक लचा चिक्शो बाक्नीम।

4 का निक्शी परमप्रभु यावे आ स्वर्ग डा गेय पाइबपुकी यो पाप पतीके शिशी मतामे। परमप्रभु यावेमी मेको आन कली नरकमी ताइश्शा, नेल्ल क्येडा मरिम्शो बाक्तीकेमी सोइक्ताक्मी। मिनु निसाफ पची नाक्त सम्म छिडछिडमी चोक्शा वोइक्तीमी।

5 मिनु परमप्रभु यावेमी साइ डा मुर आन कली शिशी मपथु, नोआह ला ठीक पाइब बाक्तीके मेको नु अरु ७ जना आन कली ला श्येत रे प्रोंइतीमी। मेना परमप्रभु यावेमी रागी नेल्ल ब्वाक्कुमी ब्रीपाइश्शा, आ कली मटीब आन कली साइश्शो बाक्त। उत्पत्ती ८:१८; १पत्रुस ३:२०; २पत्रुस ३:६

6 परमप्रभु यावेमी सोदोम नु गोमोररा माइश्शो सहर निक्शी कली मीम क्रोइश्शा, पुलु सेल्शो बाक्त। मेको मटीब आन कली कोंइतीक चिनु बाक्त। उत्पत्ती १९:२४-२५

7 परमप्रभु यावेमी ठीक पाइब लोत माइशो मुर कली श्येत रे प्रोंइशो बाक्त। लोतमी पाप पाइब आन कली तशा, आ थुं शुश मनुशो बाक्त।

8 मारदे हना मेको ठीक पाइबमी नाक्त कित कित आन ग्रांग्रा दिचा डा गेय तशा नु नेंशा, आ ठीक मिम्तीक थुं शुश खाइशो बाक्त।

9 परमप्रभु यावेमी चहिं आंम कली टीब मुर आन कली “दोपा थुं थाम्चा डा श्येत रे गुंडनुडा” दे तुइक्ब। मिनु ठीक मपाइब आन कली सजाइ गेचा कली निसाफ पची नाक्त सम्म वोइक्ब। १कोरिन्थी १०:१३

10 मिनु सु सु आन दला दाक्स नु ग्रांग्रा दिचा डा गेय पाइनीमी नु अधिकार गेशो आन कली मटीनीमी, मेकोपुकीमी नेल्ल क्येडा शुश सजाइ ताइनीम। मोदेशो जोल पा शेंब काइ महिंब दुमशा, ठेयब लेशशा, थमा सुइक्ब आन कली शुक्शी पचा महिंनीम।

11 तन्न परमप्रभु यावे आ स्वर्ग डा गेय पाइबपुकी मेको आन क्येडा ठेयब नु सक्ति पाइशो बाक्तेक्म हना यो, मेको जोल पा शेंब आन कली प्रभु आ डोंइती दोस मगेनीम।

12 मेको दूली शेंब ममिम्ब ग्याइक्चा नु साइक्चा पुंडसीचा कली जरमेशो बस्तु भाव खोदेशो पा, आन तुइशो ला पाइनीम। मेकोपुकीम काइ मरुप्नीम। तन्न शुक्शी पाइनीम। मिनु बस्तु भाव खोदेशो पा खतम दुम्नीम।

13 आन मरिम्शो पशो आ पर्वम मरिम्शो पाइक्चा पुंडसीनीम। नाक्तीम आन दला दाक्स पशा ग्येरशा बाक्नीमी। गेपुकी नु भोज जशा, मुने दोक्चा डा पा इन गुम्तीक खिं मरिम्शो लुम्सीशो सेल्ब बाक्नीम।

14 मेकोपुकीमी मुर आन मीश तशा वालनीम। पाप पचा गेनायो “मोक्ल” मदेंनीम। सक्ति मपाइशो थमा सुइक्ब आन कली लेम्शा, आंम दूली लां खोइक्पाइक्नीमी। मेकोपुकी शीम बाक्नीम। मिनु सराप रशो मुर बाक्नीम।

15 ठीक लां प्रोंइशा, हेंथे गाकशा, बेओर आ तौ बालाम माइशो मुर खोदेशो दुम्तेकम। बालाममी मार पशो बाक्त देशा हना, मरिम्शो गेय पतीके रे ताकशो क्येट शुश दाकशो बाक्त। गन्ती २२:७-३५

16 मेकोमी मरिम्शो मिम्शा पचा चिकतानु, हुइक्चा पुंइसे बाक्त। दोपा हुइक्चा पुंइसे बाक्त देशा हना, मब्वाक्ब गधामी मुर आ सेंदामी लोत्र पवा बाक्त। मिनु परमप्रभु यावे आ लोत्र पाइब कली मेको आ मरिम्शो गेय रे तेक्गा बाक्त।

17 मेको दूली शेंबपुकी ब्वाक्कु मयीब धारा नु फशेम बेरपाइशो गोस्स खोदेशो बाक्नीम। मेको नेल्ल क्येडा छिडछिड डा बाक्तीकेमी वोइक्चा पुंइसीनीम।

18 मेकोपुकीमी हेंथे लोत्र पा पाप रे प्रोंइचा पुंइसीशो नक थमा सुइक्ब दुम्शो मुर आन कली आन हेंथे पतीके ग्रांग्रा दिचा डा गेय पपाइक्नीम।

19 मेकोपुकीमी “गे पाप रे प्रोंइशो मुर बाक्नीनी” दे लोत्र पाइनीम। तन्न ग्रांग्रा दिचा डा गेय आन वाइल बाक्नीम। मार मारमी मुर आन कली ग्राबा, मेको आन वाइल दुम्नीम। गलाती ५:१३; १पत्रुस २:१६

20 मुरपुकी इं प्रभु येसु ख्रीस्त कली तुइक्तीकेमी रागी रागी डा मुर आन पाप रे ब्रोंइशो बाक्तेकम हना, मेको लेंशा पापमी मुर कली ग्रात हना, मेको पाप आ वाइल दुम्नीम। मेको आन कली डोंइती डा दुम्तीके क्येडा नोले शुश मरिम्शो दुम वा। मत्ती १२:४५

21 मुरपुकीमी ठीक लां गाक्चा तुइशशा यो, मेको डोंइती रे पाप रे डोन बाक्चा, दे परमप्रभु यावे आ अरेशो लोत्र प्रोंइशा, पापम लेत्तेकम हना, मेको तुइक्चा क्येडा गेनायो मतुइशो हना रिम्शो दुम वा। लूका १२:४७-४८

22 मिनु मुर आन देंतीक लोत्र “कुचुममी आ मेशो लेंशा जाइब।” मिनु “पोत्र कली गिश चिक्शा हना यो, लेंशा ग्रांग्रामी गुम्दीब” देशो लोत्र थमा बाक्ब। हितोपदेस २६:११

3

येसु आ जाक्ची नाक्त

1 आं दाक्शो लोकबपुकी, गो इन कली चिठी निक्शी ब्रेक्ताकड। गो एको चिठी निक्शीमी इन थुंमी मिम्पाइशशा फ्रुकपाइक्ता। २पत्रुस १:१३

2 इन कली मार फ्रुकपाइक्चा दाक्ताकड देंशा हना, परमप्रभु यावे आ साइ डा लोत्र पाइब आन ब्रेक्शो लोत्र फ्रुकपाइक्चा दाक्ताकड। पाप रे प्रॉइब प्रभु आ अरेशो लोत्र इन कली मिम्पाइक्चा दाक्ताकड। इन शेंबपुकीमी इन कली शेंताकमे।

3 नोले डा नाक्त शुक्शी पाइबपुकी जाक्नीमी, दे तुइक्चा माल्नीनी। मेकोपुकीमी शुक्शी पा, आम दला दाक्स पाइनीम। १तिमोथी ४:१; यहूदा:१८

4 मेकोपुकीमी “लेंशा जाक्नुड देंब, ते जाक्मे? इं किकी पिपी बेक्शो बाक्तेक्म। रागी सेल्चा रे ओदेशो बाक्त” देंनीमी। यसैया ५:१९; इजीकीएल १२:२२; मत्ती २४:२८

5 मेको शुक्शी पाइबपुकीमी “डोंइती परमप्रभु यावेमी लोत्र पशा, सरीड कली मसेल। रागी नु ब्वाक्कु यो मफ्रादीम्सी” दे शेंनीम। मत्ती २४:३८; उत्पत्ती १:२, ६, ९; भजन संग्रह २४:२

6 मेना रागी नु मुर नेल्ल आन कली ब्वाक्कुमी खुम्शा सदा बाक्त। २पत्रुस २:५; उत्पत्ती ७:२१

7 मुल सम्म बाक्ब सरीड नु रागी कली “बाक्ल” दे परमप्रभु यावेमी खाल का डा लोत्र पशा, वोदा बाक्त। परमप्रभु यावेमी रागी नु मटीब मुर नेल्ल आन कली मीम क्रोइक्चा, दे निसाफ पची नाक्त सम्म कली वोइशो बाक्त।

8 मिनु आं दाक्शो लोकबपुकी, प्रभु कली नाक्त का हजार का बर्स खोदेशो बाक्ब। मिनु हजार का बर्स नाक्त का खोदेशो बाक्ब। भजन संग्रह ९०:४

9 प्रभुम आ देशो लोत्र ठीक पा पाइब। तन्न का निक्शी मुरपुकीमी “प्रभुम आ देशो मपाइब। नोले ला जाक्ब” देंनीम। तन्न प्रभुमी “सुइ

जाम्शा मलमल। आं गे लेम्मल” दे रिम्ब। हबकुक् २:३; १तिमोथी २:४

10 प्रभु जाक्मेनु, खुइ जाक्शो खोदेशो पा जाक्ब। मेना सरीड ठेयब रेयके पा जाम्ब। मारेइ मारेइ ग्रोइश्शा नुप्नीम। रागी नु रागीम बाक्शो मारेइ मारेइ मीम खतम दुम्नीम। १थिस्सलोनिकी ५:२-३; मत्ती २४:२९; प्रकाश २०:११; यसैया २४:१९

11 मोदेशो दुम्मेनु, नेल्ल मीम ग्रोइश्शा, मारेइ मलीब। मोपतीके गेपुकी परमप्रभु यावे कली थमा सुइश्शा, आ देशो लोत्र टिशा, पाप रे डोन बाक्शा, परमप्रभु आ नेक्था बाक्चा माल्नीनी।

12 गेपुकी परमप्रभु यावे आ नाक्त जाक्ब, दे रिम्शा नु गेना दुम्बा, दे मिम्स डा मिम्स बाक्चा माल्नीनी। मारदे हना मेना सरीड नेल्ल मीम ग्रोइश्शा नुप्ब। मार मार बाक्मे, मेको नेल्ल मीम ग्रोइश्शा नुप्नीम।

13 तन्न आ डोंइती देशो “नक सरीड नु नक रागी सेल्लुड। मेकेर नेल्ल रिम्शो नु ठीक ला पाइनीम” देशो लोत्र रिम्नय। यसैया ६५:१७; प्रकाश २१:१; प्रकाश २१:२७

14 आं दाक्शो लोकबपुकी, मोदेशो रिम्शा, गल्ली मपाइब नु दोस मताइब दुम्चा कली शुश गेय पने। परमप्रभु यावेमी इन कली मोदेशो पशो नु थुं नाइश्शा बाक्शो गुम्चा दाक्ब। १कोरिन्थी १:७-८

15 प्रभु आ रिम्ना रिम्न बाक्तीके मुर आन कली पाप रे प्रोंइचा बाक्ब, दे मिम्तीन। इं दाक्शो लोकब पावलमी आं खोदेशो पा, इन कली आ तशो तुइक्तीकेमी चिठी ब्रेक्ताक्व। रोमी २:४

16 मेको आ पर्बम आ चिठी नेल्लेमी लोत्र पाइब। पावल आ ब्रेक्शो लोत्र का निक्शी रुप्चा कली श्येत बाक्ब। मजोक्ब नु थमा मसुइक्ब मुरपुकीमी मेको दूली शेंनीम। परमप्रभु यावे आ ब्रेक्पाइश्शा अरु लोत्र यो दूली शेंनीम। मोपा आंमा जाम्शा लाइब दुम्नीम।

नोले डा लोत्र

17 मोपतीके आं दाक्शो लोकबपुकी, गे मेको डोंइती रे तुइश्शा, होस पा बाक्कीन। मोपा मबाक्तीनी हना, गेपुकी दूली शेंब आन दूली शेंतीके खोइश्शा, इन थमा सुइक्तीके साम्नीनी।

18 तन्न इं प्रभु, इं कली पाप रे प्रोंइब येसु ख्रीस्त आ शिशी नु मेको कली तुइक्तीकेम बारना बारन लल। मेको कली मुल नु गेना हना यो ठेयब सेल्य। आमेन।

परमप्रभु यावे आ लोत्र

Bible in Sunwar (NP:suz:Sunwar)

copyright © 2011 Wycliffe Bible Translators, Inc.

Language: Sunwar

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789937101646

The Bible without Deuterocanon

in Sunwar

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

27cd6a1c-0244-5add-a4e8-b4f0e5104473